

Date – 25/04/2026

Time - 18:30 -18:40Hrs

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Mizoramah Malaria vei zat tlahniam mahse malaria nei ve mang lo district-ah te a pung leh hluai thei a, in ven reng a tul tih mithiamten a sawi.
2. Tunhnaia khawlum lutuk kaihnawih natna hrang hrang laka in ven nan mipuite chu nisaah awm tam lo tur leh tui in tam turin mithiam ten an chah.
3. West Bengal Assembly inthlan thawhnhina atana campaign chuan a vawrtawp a thleng chho tan
4. Prime Minister Narendra Modi chuan Pathianni chawhma dar 11 hian 'Mann Ki Baat' programme a hman leh dawn.

<><><>

**MALARIA DAY**

Mizoramah Malaria vei zat tlahniam mahse Malaria chu thosi seh atanga natna kai theih a nih avangin, malaria nei ve mang lo district-ah te pawh a pung leh hluai thei a, in ven reng a tul tih mithiamten a sawi.

Directorate of Health Services-a State Programme Officer cum Additional Director (Malaria) Dr Lalzawmi chuan Akashvani News Aizawl nen an inkawmnaah, Mizoram chu kum 2024 atang khan India ram pumah sikserh natna, Malaria vei tam berna a nih thu a sawi a, kuminah chuan Mizorama Malaria vei zat tlahniam deuh mahse ram pumah a tam pawl a la ni a ti bawk. Malaria ti rem tura theihtawpa kawng hrang hranga hma an lak hnuah kum 2024 nen khaikhinin kuminah chuan Mizorama Malaria vei zat chu zaa 45 velin a tlahniam tawh a ti a, chhimlam district hrang hrang-Siaha, Lawngtlai leh Lunglei bakah khawthlang lama Mamit district chu Malaria hluar zualna hmun te a nih thu a sawi a ni. Malaria chu thosi seh atanga natna kai theih a nih avangin, thosi kai theihna te ti tlem tura hmalak reng a ngai a ti a, malaria nei ve mang lo district-ah te pawh a pung leh hluai theih avangin in ven reng a tul tih a sawi a ni.

NVBDCP Consultant Entomology Dr K Vanlalhruaia chuan Malaria chi 5 awmin, chung zinga 2- Malaria PV leh PF chu Mizoramah a tam a ti a. Tunhnaiah Mizoramah Malaria PV a hluar chho hle tih sawiin, hei hi a chhan chu damdawi an

ei kim loh thin vang a ti a. Khawsik a rehin damdawi thlah ringawt lovin Malaria PV-ah chuan ni 14 damdawi ei ngei ngei a ngai a ti a, damdawi ei kim loh chuan a natna chu a lo lang chhuak leh mai thin a ti a, Malaria vei nia in ringhlel te chu in test vat thin turin a chah bawk a ni.

Lunglei Dist- ah chuan PHC hrang hrangah World Malaria Day pual hun hman a ni a. Sr CMO Dr.Lalrinthangi chuan Malaria natna vei lo turin thosilenzar that te, thosi pian theihna tui sahkang te, thosi hlauh hnawih chi leh hal chi te hmang thin turin mitin te a fuih a. Khawsik, luna/ chau leh tlun a awm chuan thisen laktir vat tur leh malaria hrik hmuh anih chuan damdawi tha taka ei turin mitin te a ngen bawk. Nimin khan a hnathawh bulpui ber ASHA te pual in workshop neih a ni tawh a ni.

Lunglei Civil Hospital Malaria Consultant Pu Vanchamliana Chhangte hnen atangin an district report ngaithla ang.

<><><>

## GINGER

Kut hnathawktute sawhthing hralhna hmun tur bika sorkarin a ruahman Secondary Collection Centre (SCC) 64 zinga 44-ah te sawhthing quintal sing 6 & 9,181 hralh a ni tawh.

Mizoram Agriculture Marketing Board (MAMB) hnen atanga Akashvani Aizawl News thudawn danin, SCC 64-a sawhthing awm zat tura tarlan chu quintal nuai 3, sing 4, sang 6,470 a ni a, tun dinhmunah sumdawngten an lei tawh zat quintal 69,181.269 hi hralh tur zat atanga zaa 19.96 a ni.

MAMB-in support price awma sawhthing hralh theih hun tura bituk chu February ni 2 atanga May ni 30 thleng a ni a; hetihlai hian MAMB-in sumdawngten kut hnathawktute sawhthing an leina man hniam ber tura a bituk, Reserve Price kg-ah cheng 40 atanga 45 inkar chu lei ngam an awm mai lova. February ni 9 khan Reserve Price chu cheng 30-35 inkarah tihniamin hralh chhuah tan chauh a ni a. February ni 9 atanga nimin, April ni 24 thleng khan sawhthing hralhna hmun tur bika ruahman Secondary Collection Centre (SCC) 64 zinga SCC 44 - atangin sawhthing kg nuai 69, sing 1, sang 8,126.90 chu cheng vbc18, nuai 6, sing 8, sang 2, 913.50-a hralh a ni tawh.

Tun dinhmunah SCC-ah te hian sumdawngte chuan sawhthing kg-ah cheng 20 atanga cheng 25 inkarin an lei mek a, sorkarin ba awm loa lei tura sumdawngte a tih angin sumdawngte hian an sawhthing leina man hi kut hnathawktute hnenah an pe tawh a, sorkar erawhin support price chu hralh zawh hunah a pe chauh dawn thung a ni.

<><><>

## HEAT WAVE

Tunhnaia khawlum lutuk kaihhnawih natna hrang hrang laka in ven nan mipuite chu nisaah awm tam lo tur leh tui in tam turin mithiam ten an chah.

Akashvani Aizawl News zawhna chhangin, Ebenezer Medical Center-a Medical Director Dr Vanlalsiama Chhangte chuan tunhnai khaw lum lutuk avang hian khawlum kaihhnawih natna hrang hrang- heatstroke, chauh leh zawi te a awm thei a ti a. Hemi laka lo inven nan hian khawlum leh nisaah rei lutuk awm lovin, daihhlum leh thingkung hnuai a awm a pawimawh a ti a. Hei bakah hian inbual, taksa tih daih leh fan hnuai a awm bakah tui leh thil tuiril lam chu in thin dan pangngai aia in tam a ngai a ti a, taksa mamawh zat ang tui kan in tam em tih mahnia hriat theihna tha tak chu zun rawng a var thei ang ber a nih thu a sawi bawk a ni.

Nimin khan ICAR RESEARCH COMPLEX FOR NEH REGION, Kolasib chuan khawchin mila ran leh thlai enkawl dan inkaihhraina tichhuakin, khua a lum chhoh bakah thli leh tek tla a awm chhoh zeuh zeuh hmel avangin ran vulhte hmun himah dah thin turin ran vulhtute an chah a. Extended Rain Forecast System (ERFS) in a tarlan danin April ni 29 atanga May ni 5 inkar hian Mizoram chhunga ruah tla chu dan pangngai aia sang zaa 180.68 a ni dawn a ti a. Ruah a sur hnaih maitheih avangin tlangram leh hmun awiha huan leh lo neite chu vaimim, behliang, mai, um ei leh thlai dangte tuh tan tawh turin a chah a ni.

Thlai ten nisa leh khaw lum an tawrh nasat lutuk loh nan nisa zar hliahna tur shade net hmang a that thu sawiin, lei tha leh hlo kah bakah thlai seng chu boruak daih hnu deuhah ti thin bawk turin a chah a ni. Ranvulhtute chu an ran vulhte tan tui dai leh thianghlum, an kham khawp chhawp sak reng tura chahin, Ar vulhte chu tawt lutuk a khung khawm lo tur leh boruak luh that nan ran in tukverh leh ventilation te siam that turin a chah. Khaw lum vanglai hian ran te chu an kham khawp tui chhawp sak reng tur a ni a, ni sain a em nat loh dahlima dah thin turin a chah bawk.

<><><>

## MAXI CAB ACCIDENT

Vawiin chawhma dar 9:40 vel khan Hmawngbuchhuah atanga Vaseikai pantur Maxicab pakhat chu Tuichawngtlang leh Vathuampui inkar, Vathuampui atanga Kilometre khat leha chanve vel a hla ah a chesual a, a hmun ah mi pahnih an thi.

Vathuampui Branch YMA hruaituite atanga The Lawngtlai Post in thu a dawn danin, Maxicab ah hian mi sawmpakhat Mipa 5 leh hmeichhia 6 an chuanga, Vathuampui luh dawn Betsuri lui thlen hmian an chesual a, Maxicab khalhtu Pu Nghapiang Hmawngbuchhuah khua leh Maxicab a chuang Pu Naimaru Varang (Myanmar) a mite chu a hmunah an thi.

Maxicab hi Hmawngbuchhuah atangin Vaseikaia Bazar tur phur ni a sawi a ni.

Chetsualna a thleng tih hriat a nih veleh Vathuampui atangin mitlawmngai thahnemtak chetsualna ah hian kalin, Vathuampui Branch YMA chuan ruang lain, tanpuingaite a theih ang angin an tanpui a, ruang leh hliam tuarte Vathuampui panpuin, Vathuampui Branch YMA ten kuang siamin vawiin dar 1:30 khan ruang te hi Vathuampui atangin an khua panpui an ni.

<><><>

## **LADC**

Lai Autonomous District Council a Chief Executive Member leh Lawngtlai Bawrhsap chuan Lawngtlai khawpui leh District in hma a sawn theih nan theihtawp chhuah dun an duh thu an sawi.

CEM, Pu C.Lalsawmzuala leh Bawrhsap Pu Donny Lalruatsanga te hian nimin tlai khan Chawnhu a Zotlang Forest Park ah zanriah kildunin, Lawngtlai khawpui leh District hmasawna tur hrang hrang an sawidun a.

CEM chuan hmasawna atana tihtheih, LADC in a neihah te theihtawp an chhuah tur thu leh a theih ang angin tunah pawh hma an lakmek thu sawiin, Drug Free District campaign ah pawh an phak ang tawka hma an lak tan tawh thu a sawi a, khawpuia lirthei dandan a mumal zawk nan chaktakin hmalak mek a ni bawka a ti.

Bawrhsap chuan Lawngtlai khawpuin hmeltar a neihtheih nan a duan Thaw law dir tuah (Stand up Lawngtlai) leh Drug free District hmalakna piahlahmah hmalakna kalmek leh hmachhawp awm nual mahse, LADC nen pheikhai rual taka an kal chho mek chu phurawm a tih thu sawiin, thil tak tak sualchhuak tur chuan tanrualna a pawimawh a, helam hawia ke pen hrehlo CEM an nei chuan ruahmanna leh hmalaknate a hlawhtlin theih nan awmzia a nei thui thei hle dawn a ni a ti.

CEM leh Bawrhsap zanriah kildunna ah hian LADC a Executive Member pathum Pu Lalropuia Chinzah, Pu JB Vanhoy leh Pu HC.Lalengkima bakah LADC a official te an tel.

<><><>

## **AMC COUNTING DAY**

Aizawl Municipal Corporation inthlana vote tla te chu naktipah zing dar 8 ah chhiar a ni dawn a, hemi rual hian Akashvani Regional News Unit Aizawl chuan Live Discussion FM ah a tichhuak dawn a, hei bakah hian chanchinthar puan hun pangngai bakah special bulletin minute 5 a pechhuak dawn a, zing dar 9, dar 11, leh chhun dar 1 ah te special bulletin hi tihchhuah a ni ang.

Live Discussion ah hian mithiam 4 an thudawn a, Pu Adam Sapriksanga The Frontier Despatch Editor, Dr C Lalengkima, Govt Aizawl College Asst Professor, Dr F Lalramhluni, Post Doctorate Fellow leh AMC Corporator thin Pu Rosiamnggheta te an ni ang.

<><><>

## SR ADVOCATE

Gauhati High Court chuan hmarchhak state 4-a advocate 41 te chu Senior Advocate designation a pe a, an zingah hian Mizoram atangin ukil 3 an tel.

Nimin khan Gauhati High Court chuan hmarchhak state 4- Assam, Nagaland, Mizoram, leh Arunachal Pradesh a, ukil 41 te chu Senior Advocate ah a kaisan tir a, chung zinga mi 3 te chu Mizoram ukil te niin, Pi Dinari T. Azyu – Aizawl Bar, C. Zoramchhana – Aizawl Bar leh F. Lalengliana – Aizawl Bar te an ni.

Supreme Court-a Advocate-on-Record Pu JC Lalnunsanga sawi danin, Pi Dinary T Azyu hi hun rei tak High Court a sawrkar ukil lo ni tawh thin, private practice thlang ta zawk a ni a. All Mizoram Women Federation a Secretary ni lai niin Mizo hmeichhe zinga Senior Advocate Designation nei hmasa ber a ni. Pu C Zoramchhana chu MNF sawrkar laia Addl Advocate General ni thin kha niin tunah hian NIA, NIT, MRB, NCB ah Standing Counsel ni lai mek a ni. Pu F Lalengliana chu experience tha tak nei niin Mizo Adventist Choir Conductor leh hlaphuah thiam lar tak a ni.

India-a Senior Advocate hi ukil chhuanawm, Supreme Court emaw High Court emawin an thiamna, an hmingthanna, leh dan hriatna thuk tak an neih avanga an title pek te an ni.

Tun dinhmunah anni pathum bakah hian Mizo zingah Pu RC Thanga, Pu LH Lianhrima leh Pu C Lalramzauva te chu Mizoten Senior Advocate kan neih mek te an ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## WEST BENGAL ELECTION

West Bengal Assembly inthlan thawhnhina atana campaign chuan a vawrtawp a thleng chho tan a. Assembly bial 142 ah tun thla ni 29 ah vote thlak a ni dawn a. Vawiin khan BJP National President Nitin Nabin chuan Baranagar ah kawngzawh a huaihawt a. West Bengal chuan a ropuina neih thin neilet leh turin a inpeih tawh thu leh hlauhna hmanga politics khelh an hnawl tawh a ti.

West Bengal Opposition leader Suwendu Adhikari pawhin Chief Minister Mamata Banerjee na taka bein eiruknaa inhnamhnawihah a puh a ni.

Trinamool Congress (TMC) hruaitu Kunal Ghosh pawhin inthlan thawhkhatah an party chuan an thawk tha hle a ti a. TMC chuan thuneihna an chang chhonzawm dawn a ni a ti.

COngress hruaitu leh Rajya Sabha MP Pramod Tiwari leh Akhilesh Prasad te chuan West Bengal sawrkar din turah Congress chu an pawimawh dawn hle a ni an ti.

West Bengal Assembly inthlan vote tla te hi thlaleh ni 4 ah chhiar a ni ang.

<><><>

## **PM MANN KI BAAT**

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 133-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawh ang.

<><><>

## **FERTILIZER**

Sawrkar laipui chuan ramchhunga leitha chhekkhawl a tam tawk thu a puang. Union Ministry of Chemicals and Fertilizers chuan thuchhuah siamin tunhnaia leitha a vang anga thuthang chu thu belhchian dawlo a ni a ti a. Rabi season 2025-26 chhungin rampumah leitha supply a tam tak tih a sawi a ni. Nikum October thla atanga kumin March thla thleng khan leitha mamawh zat aiin chhekkhawl sa tam zawk zel a. Rampuma leitha awm zat chu Urea 257 Lakh Metric Tonnes a awm a. Mamawh zat hi 196 Lakh Metric tonne a ni thung a. DAP pawh mamawh zat LMT 53 atangin LMT 75 chuang a awm a ni.

<><><>